

Na osnovu čl. 13.b i 18.b Ustava Kantona Sarajevo ("Službene novine Kantona Sarajevo", 1/96, 2/96, 3/96, 16/97, 14/00 i 4/01), člana 3. Zakona o ustanovama ("Službeni list RBiH", br. 6/92, 8/93 i 13/94), člana 35. stav 4. Zakona o zdravstvenoj zaštiti ("Službene novine FBiH", broj: 29/97), kao i člana 71. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", br. 16/02 i 8/03), Skupština Kantona Sarajevo na sjednici održanoj 18.12.2003. godine, donijela je

## O D L U K U O OSNIVANJU JAVNE USTANOVE TERAPIJSKA ZAJEDNICA - KAMPUS KANTONA SARAJEVO

### Član 1.

Kanton Sarajevo osniva Javnu ustanovu Terapijska zajednica - Kampus Kantona Sarajevo.

J.U. Terapijska zajednica - Kampus Kantona Sarajevo, se osniva radi obavljanja tercijarne prevencije, tretmana i rehabilitacije ovisnika o psihosocijalnim supstancijama i s tim u vezi liječenja, medicinske rehabilitacije, zdravstvene njege, boravka i prehrane korisnika sa područja Kantona Sarajevo.

### Član 2.

Terapijska zajednica - Kampus Kantona Sarajevo posluje pod nazivom: Javna ustanova Terapijska zajednica - Kampus Kantona Sarajevo (u daljem tekstu: J.U. Kampus), u državnoj svojini. Sjedište Kampusa je u Sarajevu - Rakovica iznad sela Kešelji.

### Član 3.

Osnivač osigurava osnivački ulog u ukupnom iznosu od 175.281,00 KM (u novcu) za osnivanje, odnosno početak rada Kampusa u državnom vlasništvu.

Osnivački ulog iz prethodnog stava obezbjedit će se u budžetu Kantona Sarajevo.

### Član 4.

Kampus ima svojstvo pravnog lica, koje stiče upisom u sudski registar kod nadležnog suda u Sarajevu.

### Član 5.

Kampus je stacionarna ustanova u kojoj se obezbjeđuje socijalno-zdravstvena zaštita osoba, u cilju smanjenja somatskih šteta i psihičkih posljedica usljed dugotrajne upotrebe droga kao i:

- psihosocijalna rehabilitacija,
- socijalna reintegracija u zajednici na ovaj način rehabilitiranih ovisnika o drogama,
- okupacioni tretman (radna terapija),
- druge mjere iz domena prevencije, prevashodno tercijarne prevencije ovisnosti o drogama i unaprijeđenja mentalnog zdravlja,
- preduzimanje posebnih mjera i programa za spriječavanje i rano otkrivanje psihotičnih stanja (stručno-metodološka pomoć),
- zdravstveno prosvječivanje korisnika.

U okviru djelatnosti iz stava 1. ovog člana Kampus ima 30 postelja.

Kampus kao osnovni metod svog rada koristi socioterapijske, psihoterapijske, radno-rekreativne, okupacione i druge aktivnosti u kompleksnoj rehabilitaciji teških ovisnika o drogama.

U skladu sa Odlukom o standardnoj klasifikaciji djelatnosti u Federaciji Bosne i Hercegovine ("Službene novine Federacije Bosne i Hercegovine", br. 28/98, 36/98 i 47/98) djelatnost obuhvata slijedeće razrede:

31.85310	Socijalna zaštita u ustanovama sa smještajem osoba ovisnih o drogi
85.121	Djelatnost medicinske prakse
52.215.2210	Trgovina na malo voćem i povrćem.

### Član 6.

Kampus ne može promijeniti djelatnost iz člana 5. ove odluke bez saglasnosti Osnivača.

### Član 7.

Sredstva za rad Kampus ostvaruje:

1. iz sredstava Budžeta Kantona Sarajevo, najduže do pet (5) godina,

2. od pravnih i fizičkih lica na temelju ugovora koji regulišu međusobna prava i obaveze,
3. iz drugih izvora na način i pod uvjetima određenim zakonom, aktom o osnivanju i Statutom Kampusa, odnosno na temelju posebnih ugovora,
4. iz sredstava koja ostvari od obavljanja vlastite djelatnosti,
5. iz donacija.

#### Član 8.

Za svoje obaveze Kampus odgovara svom svojom imovinom – potpuna odgovornost.  
Osnivač Kampusa odgovara za obaveze Kampusa, do visine osnivačkog uloga.

#### Član 9.

Prava i obaveze između Osnivača i Kampusa, koja nisu regulisana ovom odlukom uredit će se Statutom, odnosno posebnim ugovorom.

Pravo korištenja odnosno upravljanja i rukovođenja nad Kampusom, Osnivač može prenijeti vladinoj odnosno nevladinoj ustanovi ili organizaciji koja se bavi problemima narkomanije, a na način i pod uvjetima utvrđenim posebnim ugovorom.

#### Član 10.

Vlada Kantona Sarajevo, će u roku od 30 dana od dana stupanja na snagu ove odluke, imenovati Upravni odbor, Nadzorni odbor i direktora na način i u skladu sa Zakonom o ustanovama i odredbama Zakona o ministarskim, vladinim i drugim imenovanjima Federacije BiH («Službene novine FBiH», broj 12/03).

#### Član 11.

Organ upravljanja Kampusom je Upravni odbor.

Predsjednika i članove Upravnog odbora imenuje i razrješava Vlada Kantona Sarajevo, na način i u skladu sa zakonom.

Upravni odbor ima sedam (7) članova i čine ga predstavnici:

- osnivača – tri (3) člana
- Ministarstva za rad, socijalnu politiku, raseljena lica i izbjeglice Kantona Sarajevo – jedan (1) član
- Ministarstva zdravstva Kantona Sarajevo – jedan (1) član
- iz reda roditelja - jedan (1) član i
- iz reda upostenika - jedan (1) član.

Mandat predsjednika i članova Upravnog odbora traje četiri (4) godine i mogu biti ponovo imenovani.

#### Član 12.

Organ kontrole poslovanja je Nadzorni odbor i sastoji se od tri (3) člana.

Predsjednika i članove Nadzornog odbora imenuje i razrješava Vlada Kantona Sarajevo, na način utvrđen Zakonom o ustanovama.

Najmanje jedan (1) član Nadzornog odbora imenuje se iz reda stručnih radnika zaposlenih u Kampusu.

Mandat predsjednika i članova Nadzornog odbora traje četiri (4) godine i mogu biti ponovo imenovani.

#### Član 13.

Organ rukovođenja je direktor.

Direktora imenuje i razrješava Upravni odbor, na osnovu javnog konkursa, uz prethodnu saglasnost Vlade Kantona Sarajevo.

Direktor ne može biti član Upravnog odbora.

Za direktora se imenuje lice sa visokim obrazovanjem, a bliži uvjeti za imenovanje direktora utvrdit će se Statutom.

Mandat direktora traje četiri (4) godine i može biti ponovo imenovan.

#### Član 14.

Bliže odredbe o Upravnom odboru, Nadzornom odboru i direktoru regulisat će se Statutom Kampusa.

#### Član 15.

Upravni odbor će u roku od 30 dana donijeti Statut.

Statut Kampusa podliježe obaveznoj saglasnosti Osnivača.

Viada Kantona Sarajevo daje saglasnost na planove rada i razvoja i godišnji program Kampusu.

**Član 16.**

Kampus ne koristi medicinski model u svom radu nego se za takve potrebe služi postojećom mrežom zdravstvenih ustanova u Kantonu Sarajevo, a naročito centrima za mentalno zdravlje.

Kampus vrlo usko saraduje sa pripadajućom socijalnom službom, nevladinim organizacijama, vaspitno-obrazovnim institucijama, kulturnim, umjetničkim i sportskim društvima, kao i vjerskim institucijama.

Kampus razvija saradnju i sa sličnim institucijama, kako u zemlji, tako i u inostranstvu.

**Član 17.**

Osoblje koje će pružati usluge u Kampusu pored rehabilitiranih bivših ovisnika i volontera, su i socijalni radnici, psiholozi, sociolozi, radni i okupacioni terapeuti, sportski treneri i teolozi, a po potrebi i liječnici.

**Član 18.**

Nadzor nad zakonitošću rada Kampusu vrši Ministarstvo za rad, socijalnu politiku, raseljena lica i izbjeglice Kantona Sarajevo i Ministarstvo zdravstva Kantona Sarajevo.

**Član 19.**

Ova odluka stupa na snagu osmog dana od dana objavljivanja u »Službenim novinama Kantona Sarajevo«.

Broj:01-02-25379/03  
18.12.2003. godine  
S A R A J E V O

PREDSJEDAVAJUĆA  
SKUPŠTINE KANTONA SARAJEVO

Meliha Alić, prof.

